

<><><><><><>

Kashmir Marathon

मुख्यमंत्री ओमर अब्दुल्ला होरें अज्ज बड्डलै सवा 6 बजे पोलो व्यु श्रीनगर थमां घाटी च अपनी किस्मै दी पैहली-पैहली अंतर्राष्ट्री मैराथन द्रौड़ गी झंडी दस्सियै रवाना करोआया। इस आयोजन च 13 मुख्यें दे 59 एथलीटें दे कन्नो-कन्नी भारत दे बक्ख-बक्ख राज्यें थमां बी मन्ने-परमन्ने दे एथलीटें सने 2 ज्हार शा मते एथलीटें हिस्सा लैता ऐ। बॉलीवुड दे कलाकार सुनील शेड्डी होरें बी एह्दे च हिस्सा लेआ। इस मौके पर बोलदे होई सुनील शेड्डी होरें कश्मीर दी सराहना कीती ते आखेआ जे उत्थे बड़ा शानदार म्हौल ऐ। उनें आखेआ जे सुरगै ज्नेई इस धरती पर आयोजित होआ करदी मैराथन द्रौड़ च शामिल होना, एथलीटें लेई केई मायनें च खास ऐ। उनें मेद जाहर कीती जे कश्मीर ऐसी थाहर बनै जित्थे हर ब'रे लोक मते चाएं-चाएं औना पसंद करन। इस मैराथन द्रौड़ दा आयोजन द'ऊं श्रेणिएं 42 किलोमीटर दी फुल मैराथन ते 21 किलोमीटर दी हाफ मैराथन श्रेणिएं च कीता गेआ ऐ। एह्दे शा पैहले सैलसफा विभाग दे डरैक्टर होरें श्रीनगर च इक संवाददाता सम्मेलन दरान आखेआ जे इस मैराथन दे आयोजन दा मकसद, पूरी दुनिया गी एह् दस्सना ऐ जे कश्मीर च हुन हालात बड़े मते सुधरी चुके दे न ते धरतै दा सुरग खोआने आहली एह् थाहर अंतर्राष्ट्री सतह दे आयोजनें दी मेजबानी लेई पूरी चाल्ली तैयार ऐ।

<><><><><><>

MLA Oath

जम्मू कश्मीर विधानसभा दे नमें चुने गेदे विधायकें गी कल ईदगाह थमां विधायक मुबारक गुल, जिनें'गी प्रोटेम स्पीकर यानि अस्थाई स्पीकर दे तौर पर नियुक्त कीता गेदा ऐ, होर औहद्धे दी सगंध चुकांगन। लेफ्टिनेंट गवर्नर मनोज सिन्हा होरें 6 बारी विधायक रेई चुके दे मुबारक गुल होरें'गी प्रोटेम स्पीकर नियुक्त कीता हा ते गुल होर हून नमें चुने गेदे विधायकें गी सगंध चुकाडन। श्रीनगर च संगारें दपैहरी 2 बजे विधानसभा परिसर च सगंध चुक्कने आला समारोह आयोजित कीता जाग। नमीं विधानसभा दे इजलास दे शुरू होने मगरा विधायकें दी तरफा स्थाई स्पीकर चुनेआ जाग। मुबारक गुल होरें कल विधानसभा परिसर दा दौरा लाइयै सोमवारें आयोजित होने आहले कार्यक्रम दिएं तैआरिएं दा जायजा लैता। उनें असैंबली हाल ते बैठक हाल सने मुख्यमंत्री, स्पीकर, उपमुख्यमंत्री ते दुए मंत्रिएं दे चैंबरें दा बी दौरा लाया। उनें तैआरिएं पर तसल्ली जताई ते अमले गी पूरी मेहनत मषक्कत कन्नै कम्म करने दी हिदायत दित्ती।

<><><><><><>

Omar Delegation

जम्मू दे बक्ख-बक्ख जिलें थमां किष प्रतिनिधिएं मुख्यमंत्री ओमर अब्दुल्ला हुंदे कन्नै जम्मू च उंदे निवास स्थान पर मलाटी कीती। इनें लोकें अपने-अपने इलाकें च विकास सरबंधी महत्वपूर्ण मुद्दें पुट्टे ते मुख्यमंत्री होरें'गी इंदे च दखल देने दी गुजारिश कीती। 10 अक्टूबर गी मुख्यमंत्री दा औहद्धा सांभने मगरा ओमर अब्दुल्ला हुंदा एह् जम्मू दा पैहला दौरा हा। मजूद प्रतिनिधिमंडलें मुख्यमंत्री होरें'गी नमीं जिम्मेदारी सांभने पर मुबारकबाद दित्ती। इनें डेलीगेशन मुख्यमंत्री हुंदे अगगे जेह्ड़े महत्वपूर्ण मुद्दें गी पुट्टेया उंदे च ढांचागत विकास ते समाज कल्याण कन्नै जुड़े दे मामले शामिल हे। मुख्यमंत्री होरें इस मौके उनें'गी भरोसा दोआया जे उंदी चैताएं पर तौले गै कम्म कीता जाग। उनें जम्मू दे हर इक जिले च बरोबर विकास करने दा अपना धेइया दोहराया ते आखेआ जे हर इक समुदाय दिएं जरूरतें दा ख्याल रक्खना उंदी सरकार दी प्राथमिकता ऐ।

<><><><><><>

Mission Yuva

युवा उद्यमी विकास अभियान यानि मिशन युवा दे तैहत कल कठुआ च इक ध्याड़े दे समर्थ निर्माण आहले कार्यक्रम दा सरिस्ता कीता गेआ। एह् कार्यक्रम एडीडीसी सुरिंदर मोहन शर्मा हुंदे दिक्ख-रिक्ख हेठ करोआया गेआ। गल्लबात आहले इस सत्र दा मकसद, सरबंधत धड़ें गी मिशन दे लक्ष्य दी समझ

बारै जानकार बनाना हा तांजे लोडचदे हुनर ते उद्यमिता दी मानसिकता आहले नौजवानें गी बाअख्तिवार बनाया जाई सकै।

<><><><><><>

Self Employment Schemes

पुंछ दे जिला विकास कमिशनर विकास कुंडल होरें जिले च रोजगार पैदा करने आहली योजनाएं दी अमल—आवरी दा कल जायजा लैता। बैठक दरान उनें बक्ख—बक्ख मैहकमें स्हाबै बक्ख—बक्ख योजनाएं जि'आं मुमकिन, तेजस्विनी, प्रधानमंत्री रोजगार सृजन कार्यक्रम, डीआईसी, केवीआईबी, किसान क्रेडिट कार्ड ते प्रधानमंत्री स्वाथ्य सुरक्षा योजना तैहूत मंजूर कीते गेदे मामलें दी समीक्षा कीती। सरबंधत अधिकारिणें गी आखेआ गेआ जे ओह रोजगार दे मौके पैदा करने आहले खेत्तरें दी पन्छान करन ते युवाएं गी स्व—रोजगार बारै जागरूक बनाने दे तौर—तरीकें पर सक्रियता कन्नै कम्म करन।

<><><><><><>

PM Vishwakarma

जम्मू दे गांधीनगर आहली गोल मार्किट ग्राउंड च औंदी 24 शा 29 अक्टूबर तगर पीएम विश्वकर्मा योजना तैहूत पंजीकृत कारीगरें लेई इक प्रदर्शनी ते बपार मेले दा आयोजन कीता जा करदा ऐ। एमएसएमई — विकास सुविधा दपतर जम्मू पारस्सेआ आयोजित कीती जा करदी इस प्रदर्शनी दा मकसद पीएम विश्वकर्मा कन्नै जुडे दे कारीगरें लेई मार्किटिंग दे मौकें च बाददा करना ऐ ते इस प्रदर्शनी लेई उनें गी पंडाल लाने दी इजाजत मुफ्त दित्ती जा करदी ऐ। हर इक कारीगर गी बक्ख—बक्ख खर्चें दे ऐवज च बद्धोबद्ध 5 जहार 750 रुपें दा भुगतान बी कीता जाग। इस प्रदर्शनी च हिस्सा लैने लेई कारीगर 22 अक्टूबर संझां 5 बजे तगर ऑनलाईन आवेदन करी सकदे न।

<><><><><><>

Paddy Cleaning

जम्मू दे जिला मैजिस्ट्रेट सचिन कुमार वैष्ण होरें मुंजी दी छटाई आस्तै भाह तैहू करने दे सरबंधै च इक हुकम जारी कीता ऐ। हुकमै च सख्ती कन्नै आखेआ गेआ ऐ जे कोई ठेकेदार एहदे शा बद्ध पैसे नेई लेई सकदा। जेकर ऐसा हुंदा ऐ ते कनून दे दायरे हेठ सख्त कारवाई कीती जाग। जारी हुकम च साफ कीता गेआ ऐ जे जम्मू जिले च 12 मौसमी मंडियां स्थापत कीतियां गेइयां न। इनें मंडियें गी स्थापत गी इस करी कीता गेआ ऐ जे करसानें गी अपनी फसल आस्तै घटोघट्ट समर्थन मूल्ल हासल होई सकै। इस बारी आस्तै आम मुंजी दा एमएसपी 2300 रपे प्रति क्विंटल, ग्रेड—ए मुंजी दा एमएसपी 2320 रपे प्रति क्विंटल ऐ जेहड़ा भारत सरकार दी तरफा निर्धारित कीता गेदा ऐ।

<><><><><><>